

Høyringsuttale til «Temaplan for landbruk i Hordaland 2018 – 2022» frå landbrukskontora i Nordhordland, Landbruksfagrådet i Austrheim og Landbruksfagrådet i Radøy

Utkast til temaplan peikar på mange aktuelle og kjende problemstillingar i landbruket – nedbygging, låge avlingar, høg andel leigejord, låg kvotefylling, låg lønnsemd, overproduksjon av sauekjøt, låg rekruttering/høg gjennomsnittsalder, auka nedbørsmengder osv. Vidare peikar temaplanen på tre mål : styrka lønnsemda, auka produksjonen på lokale ressursar og betre rekrutteringa til landbruket.

Det er fornuftige mål som krev mange tiltak. Når det gjeld tiltak for å nå måla meiner me temaplanen er svært mangelfull. Det står heilt ope når ein har lest planen. Det framgår kven Hordaland Fylkeskommune søkjer samarbeid med for å nå måla. Er det då meininga at desse aktørane kan søkje Fylkeskommune/Fylkesmannen om midler til prosjekt dei meiner er tiltak for å nå måla ? I så fall må dette kome tydelegare fram i temaplanen.

Det vert trekt opp fleire tema i planen. For å gjere temaplanen meir inspirerende kunne det vore trekt fram gode døme/tips i boksar.

Eit tiltak for å nå måla i planen kan vere eit årleg samrådsmøte mellom aktørane som Hordaland Fylkeskommunen arrangerer. Der faglag, FMLA, kommunane, samvirkeorganisasjonane kjem med med nytt om kva som rører seg innan deira organisasjon og kva dei gjer / kva som skulle vore gjort for å nå måla.

Ei særleg alvorleg sak for landbruket i ytre delar av Hordaland er forbodet mot nydyrking av myr. Over 50 % av dyrkingsreserven i Nordhordland er myrjord. Dei som ynskjer å utvide arealgrunnlaget sitt og produsere mjølk/kjøtt på ein lokal grasressurs vert forhindra frå dette med dette forbodet. Skal dei auke produksjonsvolumet på garden må dei kjøpe inn grovfôr frå andre kantar av landet eller utlandet evt auke kraftfôrandelen i rasjonen.

Utfordringane knytta til nedbør er vaksande i tråd med aukande nedbørsmengder. Denne utfordringa er så stor at den burde kome sterkare fram i planen og vere tydeleg på at mykje av dei offentlege prosjektmidlane (RULL mm) vil gå til avbøtande tiltak.

Når det gjeld kompetanseheving må kapasiteten innan agronomutdanning for vaksne aukast. Det er eit veldig populært tilbod som me ser inspirerer elevane veldig til innsats heime på eigen gard. Men me høyrer stadig om dei som ikkje får plass. Truleg passer dette tilbodet for mange. Foreldregenerasjonen er ofte for ung til å gje frå seg garden når neste generasjon er klar for arbeidslivet. Difor tek mange unge ei anna utdanning og har eit anna yrke fram til dei skal overta gardsdrifta.

Oppsummert :

Ein plan som peikar på kjende utfordringar, men som er lite konkret når det gjeld tiltak for å nå opplagte mål. Temaplanen må gjerast meir konkret og inspirerende for ikkje å verta eit interndokument for Hordaland Fylkeskommune.

Knarvik, 1.mai 2018

På vegne av landbrukskontora i Nordhordland

Kjartan Nyhammer

Landbrukssjef